

**PEMBERITAHUAN PERTANYAAN BUKAN LISAN DEWAN RAKYAT**

**PERTANYAAN : BUKAN LISAN**

**DARIPADA : TUAN CHARLES ANTHONY SANTIAGO  
[ KLANG ]**

**SOALAN NO. 125**

Minta **MENTERI KESIHATAN** menyatakan tindakan yang akan diambil oleh Kementerian untuk mengurangkan harga ubat–ubatan untuk penyakit kanser. Adakah Kementerian sedia untuk melaksanakan ‘compulsory licensing’ untuk ubat–ubatan kanser.

**JAWAPAN**

**Yang di-Pertua,**

Pada masa ini, di sektor awam, cadangan sedang dibuat dengan Kementerian Pendidikan dan Kementerian Pertahanan berkaitan pembelian ubat secara pukal. Perolehan secara pukal atau '*pool procurement*' ini dapat meningkatkan kuasa beli Kerajaan dengan meningkatkan kuasa rundingan terutama untuk ubat-ubatan dari pembekal tunggal agar harga yang dibeli adalah berpatutan kepada negara. Sebanyak tujuh jenis ubat kanser yang dibeli oleh ketiga-tiga Kementerian telah dicadangkan untuk '*pool procurement*'.

Pada masa yang sama, pihak Kementerian juga sedang dalam peringkat menyediakan kertas cadangan mekanisme pelaksanaan kawalan harga ubat-ubatan bersama-sama dengan pihak Kementerian Perdagangan Dalam Negeri dan Hal Ehwal Pengguna (KPDNHEP). Mekanisme kawalan yang dicadangkan adalah harga jualan siling kepada pengguna di semua saluran pendispensan sama ada di hospital, klinik dan farmasi swasta yang dilihat paling sesuai untuk dilaksanakan dan selari dengan amalan antarabangsa. Selain dapat memastikan harga

ubat-ubatan berada pada tahap yang berpatutan, inisiatif ini juga dapat menyelaraskan harga ubat termasuk ubat-ubatan untuk penyakit kanser.

Secara amnya, pendekatan pelaksanaan Hak Kerajaan (Rights of Governments) untuk meningkatkan akses kepada ubat-ubatan hanya akan dilaksanakan setelah segala usaha alternatif yang boleh dilakukan bagi meningkatkan akses tersebut menemui jalan buntu. Pelaksanaan Hak Kerajaan untuk meningkatkan akses kepada ubat-ubatan juga hanya akan dilaksanakan jika sesuatu jenis penyakit itu diklasifikasikan sebagai masalah kesihatan awam (*public health concern*) dengan mengambil kira semua keperluan undang-undang yang berkuatkuasa.

Walau bagaimanapun, terdapat beberapa kaedah atau strategi lain yang boleh dan sedang digunakan untuk menambahbaik akses pesakit kepada ubat-ubatan yang terlalu mahal seperti untuk rawatan kanser. Antaranya ialah dengan menggalakkan pendaftaran ubat-ubatan generik/*biosimilars*, kerjasama antara kerajaan dan swasta dalam hal rundingan harga dan perolehan ubat melalui kaedah *Patient Assistance Scheme*. Strategi-strategi ini turut dilaksanakan di negara-negara lain sebagai usaha meningkatkan akses pesakit kepada ubat-ubatan yang mahal.

Sekian, terima kasih.